

四庫全書

集部

欽定四庫全書

五百家播芳大全文粹卷六十二

宋 魏齊賢

葉 榮同輯

疊幅

通判 簽判 教官 諸司幹官

上通判小簡

王春正月即辰恭惟行旆舒徐神扶斯文台候動止萬

福某三沐三薰敬裁尺牘申玷典籤

前問想塵清覽不審適辰台候何侶仰惟作觀物理與
道階行靈府虛明百嘉來舍春序向和更祈上律天時
俯遵月令寶練粹和茂膺龍光某無任珍禱

伏審恭承帝命榮倖侯藩凡託悃懔舉增欣忭某忝以
屬吏即遂道左迎謁謹先具采訥敬申燕賀之誠伏惟
煥察

恭惟某官踐履醇懿追配古人學問深洪度越今世為

文非道不言橫放絕塵蓋其餘事上方登用賢俊石渠
金馬首當問津展驪治中興議拂然伏惟明詔擢除近
在旦夕區區賀誠泚筆以俟

某忝走執事盛名之下非一朝夕末學孤進無緣瞻拜
光塵惟是尊仰道誼拳拳于此不敢自棄茲承鼎臨天
府贊貳邦條某幸預屬吏之末承顏承奉教誨有日矣
私心慰望喜何可比量匆匆布敘莫究萬一

某學不聞道謬當邑寄纏困朱墨迄無善狀曠敗之虞

旦旦芒負唯厚德君子尚教誨收憐之俾免于戾幸甚
幸甚某瞻望門牆無任依戀之至

僭越申問台關仙眷伏惟百福攸同下邑恐有使令拱
聽要東

上通判小簡

仲秋謹時伏唯貳政雄藩關決多暇天佑神相台候動
止萬福某瞻望台階行遂趨承之幸情預欣抃謹具仰
候起居

申侯常儀已具右幅惟時秋律寢清商飈向肅伏惟退
聽餘閒神相盛德養溉粹和福嘏增固更祈益調茵鼎
前需召節下情祝訟但切拳拳

某晚進寒生佩服名德令譽之久無從一拜履台階唯
是景仰不勝拳切茲者天幸遂以孤蹤得託庥庇遵奉
約束雖未能斂板堦墀仰瞻光範而夙昔向慕之勤已
煥然冰釋矣何慰如之

某官業懷康濟志存經綸粹然圭璧之光久矣廊廟之

具尚遲大用暫貳雄藩行膺治是之褒亟被清華之選
當攄素蘊早集殊勲論所期可拱而俟

某庸瑣常流叨塵仕版再調銓部獲司理曹猥以孱陋
得事高明之下幸可言耶尚須面奉規繩式遵軌轍庶
逃瘳曠全以始終魯情不勝至願

某不量踈繆輒裁小啟少叙獲託悒悒之幸鄙詞陋句
冒瀆台重得賜容貸不勝幸甚

上通判正小簡

句芒司令寒氣未闌恭唯貳撫閒暇明靈叶衛台候燕
興萬福某寒晚微蹤益叨幪履尚遙趨拜堦廡謹具手
啟上溷記曹

謹時脩問之儀祇具禩禮未審近辰德履復何似欽惟
佐政中和聲華日飭休祥駢集密有扶持春序肇開更
祈惠時珍毓前席密召

某官厚德鎮浮傑才拔萃暫勞別乘未厭輿評當茲亨
泰之辰佇聞進登朝著茂建勲庸誦詠之深實非私臆

人元紀侯萬彙浸榮恭惟某官順迎喜祉休慶彌新某
以攝事有拘阻瞻台席輒馳尺牘少代獻觴傾頌之勤
言莫能既

去冬以微賤趨稟幸獲瞻侍台光深慰傾戀之誠過荷
眷誨尤極銘感再違儀矩又復幾月豈勝山仰之私賤
事倥傯未獲脩貢尺牘便介之來先辱台翰益服謙厚
之宏悚戴何已不敢別具謝幅竊覲恕察

某疎愚頑拙仰託德蔭竊食備員無補消毫日懷愧惕

更望憐其賤貧垂加金庇俾終逭于愆尤實舉家之厚
幸懇禱之情敢祈洞察

上通判小簡

承候興寢敬遵彞式敢敘前幅歲律崢嶸冰霜嚴厲不
審台履復奚似諒惟闕決雍容冲襟泰定尚願茵鼎精
護益綏福履倚需迅召以陟華近某下情豈勝祝頌之
至

某仰服台望閱歲滋久自惟寒微無由進干典謁以奉

光儀拳拳瞻慕良役卑悰茲以天幸叨宰山澗獲隸部
封以備指呼之役超覲伊邇預切欣榮

恭唯某官碩德宏才蜚聲騰茂尚煩關決以屈遠圖公
輔之量不辭佩刀名節之來豈俟駕屏星而行耶即登
禁途以彰朝著得賢之盛公論所屬非某敢佞

上通判小簡

欽問大畧如右即日秋暑恭惟關決之餘尊候萬福某
蒙恩方茲承乏末由款門邇風不勝惓惓之懷謹勒參

候

幸同土壤夤緣孝卿自是姻家薄宦飄然未有侍坐聽
言之幸但劇跂仰暑氣未艾更冀調護茂對寵休以副
區區之禱

某昨竊祠觀之祿竄伏湖山幾與世隔以故無從通一
書之勤竭來行在又復擾擾意生枉誨翰之辱禮數過
當下情感戢無以為喻某官學問根本蓋自家傳推其
棄餘以貳邦政豈足以煩游刃哉諒惟朝夕譽動冕旒

必有晉擢以快輿望

某哀晚倦遊久安閒放故今牽強以來坐待汰斥而誤恩踵至實出鄉黨平昔借坐之素無緣占敘感激之私更勤慶慰何愧如之

上通判小簡

獻歲發春授時伊始伏惟貳政黃堂屆茲穀旦台候動止萬福某備員無補仰托雲庇下情無任感著謹奉啟候問褰寢

申賀之誠已布衆訥即辰茂惟神介靖共戩穀繁集更
祈精護茵鼎妙用冲和即前不次之擢

去臘遞中伏奉台翰振矜祇讀佩服撫謙下情感激無
限諸儒百川朝發夕至更幾倍保崇重迎踐休祉不任
願望

恭惟某官上庠第一流人學問文章譽望甚偉毘陵士
子皆相慶以為得師然恐席未煖而名節已在門矣某
何幸得親見之前歲幸獲瞻拜儀矩一見傾蓋禮意勤

渠至今感戴不去心今茲幸會遂得日親誨藥慰拊之懷宜勝言哉併容面敘

輒有短啟仰荅來賜顧辭鄙義拙不能發揚萬一第深惶懼一讀置之乃幸

台閣仙眷恭惟由中及外享福無窮此間預有使令切望詳細下喻敢不盡心

與教授小簡

淨暑正熾伏惟趣裝良勞神明協相台候萬福某行獲

依承尚間伏覲加念鼎第以前名擢

自昨者一識芝宇距今許年雖間關契濶不相聞問然
拳拳盛德自不能忘今者獲聯王事將有朝夕承教之
幸其為欣喜何可比量匆匆布敘未究萬一伏幾照亮
某官學識文采藉藉在人宜登臺閣羽儀鸞鷟屈臨泮
水未可輿情然俾毘陵士子得在矜式日資博約底于
成就亦衿佩之幸遇也會聞褒名即有亨踐區區系望
伏審光膺宸綍榮領泮宮伏惟驩慶某未遑脩致賀悃

宜意薰仁亟沐誨函副以長牋之況佩服謙撝言之不
盡輒復以短啟敘謝伏幸過日

與教授小簡

秋律已盡不審辨嚴豐餘尊候何似伏惟神相令德坐
擁繁祉末由以省對敢冀為時加護寢卑情勒頌

奔走英望之下久矣末路無從參際屬者津亭幸瞻履
舄乃聞使舲遙邁竟不果畧叩緒言迄今遺恨鱣堂在
目坐阻至前卑情尤劇惓惓

一昨睽間念欲附承起居而賤事無少隙方切坐愧竟
蒙誨牘光及不敏罪何所逃使介亟還馳報簡率併深
震忤賜咎幸甚承啟遂有日想惟齋舫已入郭矣遂有
曳裾候館之期宜勝欣抃

與教授小簡

責問已具別啟歲發春恭惟吉德對時茂育休祉某
竊食奉親尚阻稱壽敢冀為斯文加厚茵鼎以須簡拔
間違言面寢歷許時前月前日因巡齋一到服膺緬懷

疇昔從容之樂祇自感嘆到家而來使踵門抵以手書
書辭華潤慰薦存拊溢于累紙非獨風誼絕俗震驚哀
儒而問學之富見于筆墨父子兄弟捧硯至紙敝墨渝
不能已已屬元日趨朝歸而人事紛紛勉作報狀未能
如禮雖然使更稽留亦何緣能盡話也望寬其罪平時
士友皆謂壽基直諒多聞宜在論思風化之職不然代
言西掖發揮德意尤所優為今且老矣陪都表師多士
士友宜得無罪哉沈和仲日相見邵叔承不輟師皆能

言動靜未即面承臨問惋悵而已

兩辱惠書固荷高誼至于國緘疊幅若待賔且貴者最爾何以堪之從遊二十餘年乃不以字呼我未省所以得罪者皇恐皇恐去年秋初蒙恩兼職東宮日舉朝謁朝廷察其隔城非使因許移國南荒薄何有每每叨冒皆自朋舊疇昔之私阻遠未由走謝尤劇慙荷

蒙分餉果實皆京師歲節所需時哉時哉山樂以餉老母尤佩至意值冗未有以為報有愧而已

上提幹小簡

朱明戒候節氣清和恭惟賓幕容與神示拱扶台候動
止萬福某謹記奏于下執事

遵月財緘已肅問幅不審邇辰台候何似敬惟婉畫有
相福祿駢臻竊更蘄揆序必嗇天倪以俟不次之擢
伏承某官擇用剛辰已諧視篆伏惟慶慰某官歲有守
不克諧賀謹申采訥布叙微誠伏冀矜察

某官詩文家傳簪纓世續文章風采為當代第一流人

久矣踐揚固當躡躋畢貫入幕外臺雖云畫諾所資未
究底蘊第恐席未以溫即被召除區區州縣豈能久駐
濶步耶不敢為佞

某辱同里閑服膺偉望非一朝夕念脩桑梓必恭之禮
出處差池願竟莫獲茲幸賢德鼎來忝隸屬邑所恨某
之去替不遠趨承之日為淺耳或能假事受約束於大
府敬當走見以傾卑悰伏紙眷眷

某學不聞道緣臨支邑亡何去此迄無善狀旦旦凜然

仰賴敦篤鄉誼周旋覆露不以罪行則賜大矣敢布腹
心伏乞矜念

與諸司幹官冬小簡

裁賀之禮已具公式即日氣候凝寒伏惟替畫優閒神
人攸介尊候燕興萬福某備員徧郡密賴庇輝尚稽瞻
對謹布啟承候

亞歲屆期陽施陰化伏惟君子履之茂膺純祉某拘守
郡寄躬慶未遑輒脩緘以見誠悃其為禱頌毫楮莫殫

某官名德並邵器識兼宏宜在要途以彰素蘊暫淹畫
幕未快輿情佇聞乘此亨時榮躋華貫式副願言之望
某非才代匱日借獎提雖感懷高誼造次不忘而因循
倥偬久缺記室之問因謹脩慶以敘鄙情敢靳煥察

與幕官小簡

初暑恭惟蓮幕宴間尊候萬福引望門牆望未有參覲
之幸不勝馳情謹上狀布執事

辭去忽見長夏雖吏事倥偬而仰止盛德未嘗少忘即

日為況如何公餘戲綵有足樂否暑氣寢可畏伏冀留
意興寢以膺不次之除乃所願望

歲初伏奉誨翰爛然累紙佩荷不忘之眷豈勝下情欲
具報屬到官公冗迄今未能少休日復一日竟坐不敏
高明有以寬照幸甚

桐川諸事如何高才淹留曾掾殊非所稱方急賢之朝
旦夕定當薦薦用也

與檢法小簡

維時孟夏恭惟使幕雍容神示介相台候動止萬福某
謹具稟訥仰溷記史

申候起居不敢不肅近辰不審台用何似仰惟冲襟粹
德宜介禧祥更乞揆序焚香天倪亟前不次之召某忱
請

伏審某官消用剛辰已諧視事恭唯驪慶某恭與僚屬
之末禮合候賀趣還下局坐是不果謹馳緘封以代面
慶伏冀煥察

某慕用賢德歷用于此茲幸瞻敬慰悅尤劇別去光儀
又復旬浹西面拳拳何可殫忘尺楮寸毫言不勝敘

某官德履純誠器度凝遠踐揚之久故宜平步夷途惟
快人望入幕外臺雖云讞決所資未究底蘊居亡何薦
書上騰即備召除區區州縣豈足以淹榮躅也不敢為
佞

某庸繆魯下誤當邑寄歲糜月費亡補公家雖去替之
期僅止半載若何為善後計茲幸仰依仁庇尚冀周旋

覆露不以罪行則受門下之賜厚矣腹心是布頂踵知歸

知縣

上知縣交代小簡

仲夏之月恭惟辨嚴容與神示飲相台候動止萬福某謹啟仰溷典籤之史

詞問之禮取至再三近辰梅雨霑潤不審台候何似冲襟盛德容有扶持更祈上為朝家益厚持養遂登臺閣

之華垂副忱請佩服譽望之隆積有歲年敬問賢德屈
臨邑寄于某辱在交承稍喜幸自語繼自今詎惟識荆
仕契伊此權輿屬與賤職受約束於太府適邂逅台表
又獲爭先覩之快慶抃之私不能自言尺楮寸毫莫究
萬一

某官主璋稟質梁棟標奇學識文采今代第一派人
久矣踐揚當在清近百里宜為大賢之路尚從此來輿
議拂然會當即有成除鋒車迅召匪伊聞耳某何幸得

親見之

某拙政催科迄無善狀昨幸為任兩期之制某于前歲八月十七日交割職事全無告假補填亡何終吏願言早賜叱馭非惟獲奉教約亟令去此無以罪去門下之賜厚矣區區敢冀矜念

台閣仙聚恭惟履茲中夏內外駢擁日新之祉伏念此間宜無委喻事件直下恐欲人使令併巧要束

與知縣小簡

仲秋謹序恭惟承流宣化宜第靖共天人欣相台候動
止萬福某鄉晚將遂瞻際之幸謹先勒啟承候興寢
仰聞藉甚之譽望于搢紳之久願一拜英猷而參商未
遂下情勤向鑒昧不忘邇辰秋律向中涼颺順序不審
視履何似伏惟撫字賢勞神明擁祐純嘏日增更祈調
護寢饋逢辰太和魯悰祝頌不勝虔邇

伏以某官襟量清夷器資宏博忠嘉貽厥世濟其美淹
回百里未究遠圖佇聞報政即奉綸音入聯華要以快

興言行且見之非敢佞也

某連蹇孤蹤溫叨末第再注掾曹獲赴會府遂與賢明
服聯王事榮幸何多某赴官伊邇承顏接辭指日可俟
下情預切欣快

與知縣小簡

冬律凝慘伏惟脂轄餘暇神示呵護台候動止萬福某
備員蒙免幪庇及之豈不知感敬勒此以謝先施敢蘄
惠序珍攝天倪即前峻名

飲閭令望服膺有年莫諧願見永懷道德鑒昧良勤天
與之幸迺得以敝政上累交承晤言之便僅止數月其
為欣愜未易言受伏審簡自淵衷來撫民社師帥所臨
旄倪胥悅何當趨就下風前敘慶慰瞻言千里徙倚不
勝

竊自除目初下日欲為記室之賀屬僻左游客簡稀不
獲承奉都騎所寓用是竿牘亟受謙德所先雖高明無
意苛禮然懈弛之咎何以自逭也面謝猶積伏增愧懼

某官以豪英早都美仕謂宜歷金門上玉堂為天朝之
羽儀久矣州縣徒勞未快輿誦循良之選政恐難抑才
又匪伊嚴名徑踐清華區區蹄涔何足回翔也嚮風有
素不敢輒佞

某來此適累政權攝而承以懦弱支弊扶顛幾不能勝
幸連歲豐稔公租粗饒行且脫去又得明君子為之掩
惡已傷之錦完于敏手此情欣賴未易量也

與知縣小簡

薄寒伏惟尊候動止萬福某承乏無補未期會面敢望
以人自愛以膺名擢

使至伏承問字感慰并劇且審比日撫字心勞政事有
暇尊俎文字其樂無涯相望懸絕引領拳拳

寄示屬丈三尺燦若珠玉磊磊盈紙賞嘆不覺寒家之
暴富也珍感珍感

恭幸同年不自知其不肖輒以賢者才德治狀薦聞雖
日僭冒庶竊知賢之義以為榮耳

弟姪親戚寄治所倘明政能使之循理不擾縣道猶賢
于恩德也至祝至祝

罪戾之餘西來無補正合汰黜誤恩俄遷重有皇懼同
年宜有以補過而長牋作賀宜所宜乎仰承高誼不勝
反側

惡詩反被之石以彰其謬慙皇慙皇牋紙分餉殊荷故
人戀戀之意某物聊奉篋筭非為報也



五百家播芳大全文粹卷六十二

欽定四庫全書

集部

五百家播芳大全文粹卷六十三
四

詳校官侍郎_臣劉躍雲

助教_臣常循覆勘

總校官編修_臣王燕緒

校對官中書_臣李荃

謄錄監生_臣徐紹城

欽定四庫全書

五百家播芳大全文粹卷六十三

宋 魏齊賢

葉 菜同輯

尺牘

與范蜀公帖 與司馬溫公帖 與王荊公帖

與王荊公帖 與王荊公帖 與文潞公帖 與

夏公帖 與夏公帖 與晏公帖 與呂參政帖

與呂參政帖 與范文正公帖 與韓公帖

與田樞密帖 與孫元規大資帖 與孫元規大

資帖 與孫元規大資帖 與蔡君謨帖 與王

禹玉帖 與張端明帖 與馮當世帖 與曾學

士帖 以上闕

與郭祥正大博帖

王介甫

得與存問區區哀感所不可言示及詩編壯麗俊偉乃
能至此良歎駭也輒留巾匳永以為玩山邑少事不足

以煩剗治公餘暇日足以吟詠無緣一至左右惟自愛
重以副嚮往之私幸甚

罪逆餘生奄經時序咫尺無由自訴伏承存錄貺以詩
書不勝區區哀感詩已傳聞兩篇餘皆所未見豪邁精
絕固出于天才此非力學者所能逮也雖在衰疾把翫
不能自休謹輒藏之中匣永以為好知道引事稍熟布
希為人慎疾自愛幸甚

承示新句但知嘆愧子固言之未知所謂豈以謂足天

才卓越更當約以古詩之法乎哀荒未能劇論當俟異時耳聞有殤子之覺想能以理自釋情累也某罪逆荼毒奄忽時序諸非面訴無盡近承屈顏殊不得從容奉顏色遽此為別豈勝區區愧恨乍遠千萬自愛承行李朝夕當復來此諸須面訴乃悉許詩不惜多以藁副見借為幸

比承手筆尤劇欣慰時序感心不能自釋咫尺無由奉見嚮往尤深蒙許寄詩幸甚尚此留連不惜數賜教也

冬寒自愛舍弟近出歲盡乃歸承書所以不得報也

與錢舍人帖

司馬溫公

比日前聞君倚有滁州之命某自時已入四章求自黜
若訟君倚以言獲罪不當如此之重乃是自為道地也
以此不敢與君倚同謫也而已至今尚未得請欲留則
不得曉夕皇皇棲身無所仰視君倚如遷者輕舉計君
倚亦不用此戚戚也以著令不得躬往致錢

與丘殿丞帖

孫元規

奉別逾紀疎于附問企渴何言人至承惠字及著文足見智者用心之遠而思功及物也嘆服才識故非一日矣某居憂三四年間病自今春方有生意朝廷不知累被恩命切切辭免未能決去自重任本差求江西南撫慰士民中途改往廣南哀病之餘徃徃致增舊疾不能保天年何暇賊盜為已三次上章求免未蒙允許必須至勤切祈于得請矣觀夫足下之丈病者安敢承當也此事不免與余楊同其道矣少年時無病尚可驅

策如今何為伏惟保愛草草上聞不宣

與張安道尚書帖

曾公亮

拜違風儀三換歲律而久不上記益無因而前惟乃心
馳仰之勤耳中春氣和伏惟鎮撫多閒尊候褰福數年
均佚應道氣增茂上方注意以待康濟尤願為時自愛
不宣

與張安道尚書帖

蔡君謨

違去門闌之日滋久近得還都以舊疾未平加之人事

故疎馳問瞻跂風采不勝傾系氣候寒凜伏惟鎮撫藩
圉神體休泰某叨此計局道流之術本非所能超據要
地第負競陳日所柄用比芘末游區區下誠莫由敷敘
不宣

與陶講書帖

胡武平

自抵治下私門多故重迫曾事胸中無奇親友書畧俱
成緬默日者親馭臨貺鄙州喜見時髦其乏主禮睽遇
之後聯獲二牘納之中匱猶諸隋和英文粲然難于裁

答逋慢之罪實因于此仁者尚恕應不相索于竿牘之間也早景已暄孝履何似惟願順納真粹慰其區區謹奉手啟述謝不宣

反臂相失歛然十旬既留家居密邇疆候相望丈繹杳不可得宗人節推至首詞宴起且承襟味恬適得所貺手筆情辭周洽履尚謙挹奉戢來睦相期晏歲未諧清集勉旃居易不宣

不敏無侶向者承人之乏假守湖上足下不屑僻陋翻

然賜臨樂與諸生傳經駕說相從文社彌年于茲此奉
更書遣去清集留戀時哲祇攬心曲去雪之日時勞訪
別忽爾相失愴然久之便道過家煩暑移疾書牘並廢
行李見過首蒙惠聲遠尋前好情誼之厚奉戢敢忘會
面未階求志無悶少需善價自愛良璞不宣

中間公皂至特辱手筆卹問甚厚感戴無量素性鄙朴
多簡略矧在煩冤益以逋慢脩答良晚寓慙靡所竊惟
講習無廢納忠貢部之情朝夕當報言念明哲藏器已

久策取高第先鳴諸子在此時也乃望乃望溫繹之餘
良重不次

近雪人至此嘗竊訕動靜乃知有三衢之行介至辱書
承已還講舍竭來道路起居無恙兼聆堂上萬福盛貞
之詔旦夕且下不唯賢者當疏高爵則攄發素蘊進結
明主在此行也君其努力不次

與張侍講帖

宋 祁

自汴滉之別不數月亦抵罪于憂愧中誠不暇奉書訊

以承下執事然每一望風舞羽飛肉俄聞敦服舊職改
領巨藩屏舟泛江必已署政羣論雖未大愜始得謗篋
空而榮路闢矣僕沾餘波亦還侍讀續得詔書須代許
歸人事倚伏相糾愚不能料不知今之人可賀耶弔耶
吾弟之在遠偶耶不偶耶萬事以身為本惟慎護寢味
乃情之至他懇臨紙不能盡不宣

與吳學士帖

韓稚圭

比以憂責至重殊少暇隙雖不能時具短幅以通記室

之問而企仰德誼唯日飢渴近郭固來特辱教筆且審
寢興百順不勝慰刻兼承去冬服藥多日尋慶康裕少
便有失上問甚以為愧氣候微煩更冀順時將重

與程修撰帖

蔡君謨

向觀除目承有江西之行適奉手牘暫還姑蘇水流數
日無緣接盃酒通殷勤甚悵然也涉秋浮江景氣澄爽
發人清思循行之外吟咏為適仕宦宜尋常之所泊隨
寓自如乃是了達也南都食物可以奉親但胡公來緩

當阻返流暑毒其道中多愛不宣

前日忽忽為別悵悵滋其比聞汴流尚阻行舟高懷宜
不少興滯流之嘆耶送行詩卷暫借一觀方敢抒思也
日夕為文字繁冗未果再誼傾渴傾渴

蒙書知小疾未康更須扞護拙詩今附本通呈希睿屬
為幸得法醞輒寄獻左右漫試看如何勝之但誇誘之

閒靜非錢

闕

若無病真蓬萊主人久雨稍霽清人

願葆愛

蒙惠茶數品皆清奇適會君倚庶子泉來輟烹試之恨
不同吸也西湖寒食清明州人遊從衆為盛集數日為
之達暮或聞吳下風俗亦如此然越中舟舫鮮明殊為
冠絕執事能為之出遊否哀病作少年事亦難勝矣
違別未幾復見歲道每懷辨論馳情南國承書副以佳
果珍荷嚮得雙井四兩其時人還未試敘謝不息尋烹
治之香色氣味皆極精好是為茗芽之冠非日鑄寶雲
可比也雪寒省中頗增清興

端午氣候微熱想君執事安否殊為傾素惠及卧龍珍茗猶在日鑄之上頃年曾得日鑄其品甚高今之造茶者不及曩時卧龍前無此等非精意不能至此也春三月湖上閒遊時有篇什今錄數首要知隆老尚管風物乎

與吳副樞帖

蔡君謨

違別台座今已累月瞻望之素不忘朝夕伏惟涉秋以來起居萬福某留邸中僅兩月今方東邁益遠聲采惟

冀視政之外順時自重行歸大用以慰瞻望下情無任
區區之至

謝張學士帖

王介甫

不肖學不得盡意于文章仕不得行其所學苟居竊食
動輒愧心而世之同好惡者已云少矣遇足下于此最
為相盡義不得諱其不腆之文過蒙推褒非所望也朋
友道喪為日久矣以某之不肖行于前而悔于後自己
為多矣況足下之明耶每望教督而終未蒙惟足下不

遺于朋友之義見存不勝幸甚更數日遂東去千萬自
愛不勝思懷也

五百家播芳大全文粹卷六十三

欽定四庫全書

五百家播芳大全文粹卷六十四

宋 魏齊賢

葉 榮同輯

尺牘

與孟秘書帖

王介甫

到邑忽忽欲一詣邑得奉見尚未果伏惟動止萬福歲
飢如此幸得賢令相與為治宜不至有失所者然閭富

屋之藏尚有所潤而未發者竊以謂方今之急閣下宜
勉數日之勞躬往隱括而發之裁其價以予民損有餘
以補不足天之道也悠悠之議恐不足卹在力行之而
已不知鄙見果可行否希一教有以教幸甚幸甚

自京師奉別于今已八九年事物之役無少休息時不
得馳問但增勤企忽得書乃知尚滯下邑幸得會合歡
慰無量顧惟忝一日之雅而以公函見賜慙忤不知所
謂也拜見在邇千萬自愛

幸以一日之雅而每辱以公禮見加非所望也蒙諭具
曉盛意輿監若行辭不難也至于閣下治行自謂諸公
所不知不患無知己也惟以道自釋餘留面究也蚕麥
之入今歲如何邑中幸得賢令仁佐政治之所及竊以
為慰

辱手筆感慰跋涉溪山之遠亦老矣然足以慰嚴邑元
元之望唯寬中自愛也人來還急脩答不謹幸見亮有
不逮見教

與錢待制帖

蘇子瞻

兩日不奉接思仰不可言既無緣往見空致手啟以為
無益而煩還答故不復講日聞府中僚佐知小疾漸復
常又得手教有作詩興甚慰喜也詩納去如蒙和何幸
如之諸公詩無他本即乞封示旦夕朝會必遂款話不
一

朝會踈濶遂不獲際見企渴可量歲律就盡殊無以為
樂甚惓惓也比日起居何如中前云今日當見過若果

爾人回畧諭當不出也或未暇亦不敢固屈匆匆不宣
兩日不果詣見傾仰不可言乍涼台候勝常承已拜命
正得所欲相愜雅懷但朋友懷公之去不能無惘惘然
侶聞明主知照極深其他想不復計較也明日後日皆
休務可以往謁而魏邨將出不可遠去過此雖非假日
亦可以因訪僧郊外得邂逅也想公行李亦不即辦當
少留耶冗中奉啟不一

會稽平日欲乞宜易得哉小生奉羨之意殆不可言然

亦行當繼公也舍弟差闕下試官不及奉啟計其出公未行也餘非面莫罄

倩仲蒙仲昆仲不克一別意甚不足侍奉外千萬珍愛蒙仲更礪賦筆遂取魁甲至望旦夕入文字乞郡江湖之東行亦得之但恨會稽為君家所奪耳呵呵

令子至出答教感慰良極乍冷且喜台候康勝此行知適所願但有一事當在意者梅月宜頗居高燥郡中當所偃息處皆宜易新瓦也餘具令子口白其意在沿流

揚楚不可得潭洪亦所樂也西川公服一段茶兩團酒
二壺蜀紙三百幅聊將區區恕其瀆免

子由試院來日出或能一見子容諸公欲二十日出餞
公已出城莫須少留否

別後書問簡廢到官百冗未遑上狀先辱教墨得聞起
居佳勝感慰兼集閭坐嘯竟日孟公綽豈可屈在滕薛
而哀病坐苦煩劇當易地而後安又天官司徒皆闕人
當令公厭事矣太熱不可出初到畧須鋤治紛紛湖山

咫尺尚未見也思企談笑起望西興謁謁若聞聲歎尚
冀珍衛少慰區區不宣

路中見三郎甚安渠道過介州復來相見江口恨不款
曲然亦被捉住寫數紙東來絕不作詩公必富作何不
寄示聞公今年造茶奇甚願分絕品少許子由遂作北
扉甚不遑方辭免也兩小兒迨過此邁此月當替非久
亦此來承問及感感四郎及諸季各安未及書也

久不奉書忽辱教字并次公具道盛意併增感怍比日

起居住勝兩邦相望哀拙自知當有絕塵之嘆惟腰脚
蹣跚畧不相讓可發一笑也近亦漸平復惟用溫補藥
頗覺宜人聞公每用朴硝大黃晝夜洞下乃愈此其衛
生之計哉願于不發時常進一溫平藥令不發為佳然
已發想亦非下不愈也無由面盡臨紙潤潤

專人來辱書具審比日起居清勝知暫在告想無苦恙
聊欲閉閣宴坐耳求紫雪納雲五兩去尚有數兩不欲
多馳去中年宜宜數進此藥乎相望雖咫尺所欲言者

非筆舌可究時登中和東廡望西興屋瓦可數相思何窮子由本欲請外覲得公處今又北扉此亦謬悠矣公簡上心宜能久外耶餘熱千萬為國自重不宣

日望來音此懷可知歲暮寒懷起居何似遽筒得失必降劄子歲前可得迎見否末間伏惟為國自重冗中不一

某在杭雖少勞而意思自得此來極安逸然多憂愧想識此心也只在興國浴室獨居大暑中殊清也蒙仲在

公翊所見之公翊今得符離不知當同往否承辟召小
兒感戴不可言得否猶未可知也浙西水災殊甚已差
岑楊二君朝論甚留意救卹也知之邊上秋熟可慶可
慶

數日不接奉渴仰之至苦寒起居佳勝欲見近歲天下
戶口數告為錄示早得為佳不知幾日與頴叔仲至見
臨匆匆不宣

久別傾企辱書乃知舟御在此起居佳勝甚欲少留以

須一見而舟人以潮平風正當速過遂且渡承意當復來會豈當重煩從者多多不宣

尊丈台候計安聞其樂會稽不知有書見賜否某又上輕大江重相別誰如君者此意豈可忘耶然迫夜涉險悔不堅留君一宿也軸謾寫數字付來乍遠千萬保重不一

前日作米元章山研銘此研其竒得之于湖口石鍾山之側有盜不禦探竒發瑰懷于彭蠡斷鍾取追有米楚

狂即盜之隱因山作研其理如雲過楊且伸意元章求此硯一觀也

與文玉帖

蘇子瞻

榜下一別遂至今矣辱書感嘆且喜尊體佳勝到岸即上岸可數卒否餘當面既不宣

昨辱教不即答悚息悚息經宿尊體佳勝見名敢不如命然瘡癰大作殆難久坐告作一肉飯竟且移舟池口矣山婦更煩致名劑感戴不可言謹奉啟布謝不宣

久留治下以道舊為樂而煩亂為愧數日尊體如何漕
車即至不少勞乎永日如年念公盛德不去心所要作
事為瘡腫大作坐卧楚痛容前路續寄也不罪鄭令清
苦無援非公誰復成就之某造次造次瘡病無聊不盡
意惟萬萬以時自重

昨辱惠書伏承別後起居佳勝某到金陵瘡毒不解今
日復下痢藥羸乏殊甚又不敢久留來人極愧草畧餘
熟萬萬為時自重

書已領跋尾剪去極不妨然何足取也愧愧道判大夫
其欲寫一書乏力不果乞道區區

去歲人還奉狀必達爾後行役無定遂闕馳問比日不
審起處何似某忝忝過優非許子之素何以及此無緣
面謝重增反側酷暑更祈順時為國自重謹奉手啟不
宣

寓白沙須接人而行會合未可期臨書惘惘見張公翊
出清溪圖甚佳謝生殊可想賞亦由公指示也曾與公

翊作清溪詞熟甚太多未暇錄去後信寄呈也
膏達化去極可哀雖末路蹭蹬使人耿耿永此才韻
豈易得哉雲巢遂成茂草言之辛酸後事想公必
一一照管也匆匆揮汗不復盡意耳

冗迫久不上問辱教承起居佳勝感慰兼集
違去忽兩歲思仰不忘每惟高才令望尚滯江
湖豈勝悵惘不肖忝冒過分重承戕教禮當占
辭布謝數日以病在告使者告回其速故未暇
也不罪不罪酷暑方熾千萬為時

自愛

伏蒙賜教恩勤曲折有骨肉之愛蒙世不比數何以奉
承此歡懷藏愧感大不可言累日聒聒溷煩仰荷眷與
不見瑕疵又飲食之及其可餉酒分醯蒙被無已惠益
多愧耳謹奉上稱謝春寒伏冀調護眠食以須寵光
道出貴郡迺獲淹觀風度實慰從來伏蒙大雅開接甚
厚小人何得以此薄晚奉被賜教存問幸甚拙于謀生
至煩地主餉米感愧忽忽稱謝不宣

經宿伏惟尊候萬福比欲奉承勤款教諭屬以風靜江
平伯氏堅約來日解舟不審能曲聽否得指撫今日得
券給米來旦得護兵聽行以慰伯氏之意何幸如之謹
咨稟左右皇恐皇恐

昨晚風靜遂解舟泊清溪口道遠不能入城觀隨車歌
舞之盛徒對月飲酒想見風度耳經宿不審尊候何如
伏惟萬福未申間泊銅官古縣蕭索尤思仰緒論謹奉
狀承動靜率易皇恐

與馮參政帖

歐陽永叔

自成書請外所陳哀切冀以危誠有以感動而二三公
過為顧慮曲以見留在意實厚于計則非便也奈何奈
何本欲為郡下客少涸主人復未可得然使少遷延終
當必償夙志也濟叔窮居得當世在鎮必以慰意不久
當應少起此公議久所慰慰也前承惠碑多佳者甚濟
編錄感幸感幸聞金陵人數廳梁棟陳碑及蔣山題名
甚多幸為境內所有博採以為惠實寡陋之益也病暑

草率

區區久闕致問中間辱書為感何已冬寒伏惟台候萬
福某以衰病思得一小郡養拙三二年間謀一歸老之
地此願未獲遽被責以吏事精力耗竭何止勉強不出
歲末春初到江西之行矣薛親幹敏河東風土民間事
緒可以詢問得侯幕府甚幸甚幸某也以目疾為梗臨
紙草率惟冀望鎮撫外以時為國自重

承惠寄碑刻既博而精多所未見寡陋蒙益而私藏頓

富矣中年早衰世好漸薄獨于茲物厥視尤篤而俗尚
乖殊每患不獲同好凡如所惠僅得三二固已為難而
驟如是之多宜其如何為喜幸也濟叔公議猶屈乃吾
徒之責未嘗少忘于懷而造物者第與衆人同為嗟嘆
而已宜賢人君子亨否有命殆非人力所能致耶雖然
敢不竭力辱諭感愧承專遣人至數名問其還期每云
有故未歸遂且于郵中附此候渠行別當奉狀也

昨自罷煩劇卜居城西少獲休息然有此盤桓未遂大

去正以唐史將遂終篇然亦不過秋末時事耳廬去京
師不遠計可備聞難于紙筆具道也當時據名藩優游
丈史自足為樂其餘亦一付公議但朝多賢士而獨在
外與相知之私立欲公歸來之速耳某哀病俱攻去心
甚速諸公察其實然而未肯決然放去奈何奈何原父
雖歸子華作憲朋從益蕭索當世尚壯及時讀書行樂
此外少隙時當得數奉問大熱更冀自重

與李龍圖帖

大潞公

某啟孫女子奉侍高門與家慶幸然以幼穉未嫻禮則
冀垂茲范李郎以去試有期欲且留京宅肄習兼聞已
得訓旨許之幸甚餘必李郎書中具道茲不云云

與錢穆父待制帖

蘇子瞻

遠接人未到闕吏止用手狀達誠而已亦幸仁明不深
責也久留吳越謠頌藹然想不日召還密近幸益為民
自愛迫行冗甚不盡區區到官別上問也

觀情柳子立秀才寓居屬部或去相見畧望與進幸甚

辱簡承起居佳勝示諭容面白正苦暑不能坐近夜稍涼訪及為幸不一

奉書不數然日聞動止以慰飢渴比來台候勝常秋高諸況必佳大閒逸否某五鼓輒起平明亦無事粗得永日嘯咏之樂今日重九一樽遠相屬而已新詩必多幸寄示乍冷千萬為國自重不宣

兩日不接奉思仰不可言雨冷起居佳安昨日小詩與通叔為戲重煩屬和感服可量來日無會可以何處相

聚退之所謂此日足可惜願未遽相別也不一

漕任雖非衆望然有一事有望于公浙西流殍之憂來
年秋熟乃免日月尚遠恐來年春夏間可憂賑之則無
還貸之則難索皆官力所不逮惟多擘畫使數郡糶場
不絕則公私皆蒙利事甚易知但才不逮且無是心敢
以累公況扮榆所在當留念也

今日早不免謁告今已頗安來晨幸同穎至二公臨訪
早屈為佳不能徧致簡恐煩回答只告穆父轉呈也

經宿台候萬福十日之約却為昨勉奉勅旬休致齋翌日定光佛事須至退日慚悚不已一會何微末而艱故如此乃知永叔鼎鑊之句真非虛語公轉呈穎至二公此簡芭蕉之謂不能逃也呵呵

與張安道尚書帖

蘇子瞻

雪後苦寒遠想燕居恬適台候勝常某以獨員冗迫久缺上問計蒙矜恕歲律行盡展奉何時尚冀順時保頤益永眉壽下情禱頌之至不宣

某以不善俯仰屢致紛紛想已聞其詳近者凡四請郡
杜門待命幾二十日文母英聖深照情偽德音琅然中
服聳服幾至有所行遣而諸公變和之數日有旨某與
言數君皆促就職明日皆當見蓋不敢堅卧嫌若有辨
曲直者然哀病孤拙度不能久此恐不遠當服申前懇
耳蒙知眷之深不敢不盡幸為容之禍急多忤有悔教
誨

與王副樞帖

文潞公

遠承惠書深諒勤厚感刻感刻履道園宅春物其盛東
床居之頗遂安逸光化想已披見未期切希以時自厚

與尹師魯帖

歐陽永叔

兩路地壤相接幸時文字往還然缺附狀益書生責以
錢穀強其所不能自然公私不濟況其素懶于作書也
然時聞師魯動止蘇子美事深欲論敘但尚猶豫聞有
極言乃知自信為是其善其善子美雖未極履有如排
沮羣議其益不少晉潞師魯少所樂遊其況如何春寒

千萬保重

與劉原之大夫帖

蘇子由

北歸至許已半年餘但未嘗作都下相知書故音問缺然想不訝也近承惠教具審起居如宜奉別之久企仰何勝千萬順時自重區區不宣

先公深有謙德不欲請謚自是高節朝廷不忘舊德舉行典禮亦是美事君臣各伸其意而不相妨至于厚之內承先訓不敢陳乞固有君命不敢隱藏行狀進退合

禮更無可疑若考功再有命當即錄與也況太常博士
宋景年考功高士英皆佳士銳德謨述幸勿疑耳宋高
二君皆當執筆者恐息

與秦秘校帖

蘇子由

昨日辱迂步迫晚不果從容良以愧感新詩益清麗可
愛不肖者何足以當之欽佩欽佩天寒欲雪為況佳否
前日不果從容承誨示重感作也新詩飄然益見高興
但不肖者頗愧虛辱耳何時能再往教庶更卜清論也

與孫學士帖

韓持國

昔日大旆過都某以典護藩客不獲畧奉言論逮至已
事之日又值夙駕首途欣慕之誠莫伸萬一悵悵慙
豈勝鄙懷敢意下車之初先蒙貶教為貶在謙德雖至
而使罪戾益深愧懼叢併未易殫敘新秋餘暑伏冀為
國自重少慰翹祝之想

與李舍人帖

韓持國

老拙多病人事都廢乃蒙不遺猥枉書誨佩服故人厚

意何可勝言伏惟即日動履清安脩謝後時諒蒙恕察
春暮雨寒尤希慎疾愛重

與范克夫舍人帖

韓持國

久別未嘗不思仰忽有宮臺之請冀望車騎得還里中
日夕相見遂之西洛不獲悵然春風暴暄體候何如堯
夫高才遠識賢士大夫望君進在朝廷以申遠業而又
屈閒官徒增嘆息者耳末由款接千望自愛

前問已悉堯夫高遠已有所見失子之悲無可奈何當

勿久留于會中人生如幻自是吾身朝暮不測餘曷足
道耶入洛見諸公當可開釋萬事閒適惟保護為善

與丘道源寺丞帖

祖擇之

去冬暫到闕下雖畧獲展晤然以人事紛紛不果面別
可量悵悵耳近承有黥歛之役事出意外令人驚嘆不
已忽辱手教乃知舟馭取塗散邑蒙犯隆暑衝涉良苦
即遂占對實慰牢悃冗迫中

闕

過當

非敢望于故人也不敢眡此以為報

闕

祥除伏惟尚有餘慕知有所論者恨未見之雖賴

闕

疾憊棄日茫然未獲奉并惟冀愛重不宣

承誨示勤勤豈勝感愧聞有太原新除不知果成行否
想遂治裝而西也示及法界觀文字輒留玩讀研究義
味也觀身與世如泡夢幻若不以此洗心而沈於諸妄
不亦悲乎相見無期惟刮磨世習共進此道則雖隔濶
常若交臂雖衰疲懣耗敢不勉此猶冀未死門或得晤
語以究所懷來耳眠食自愛令弟想安裕必同西上也

惠及海物愧荷不忘村落無物可以將意粟二簞馳獻
某今年雖無病年彌高美衰亦滋極少自勞動便不支
持向著字說今已成就幸未得致左右觀古人多寓妙
道于此所惜許慎所傳止此又有偽謬故于思索難盡
耳

與呂吉甫叅政帖

沈文通

金山得所寄詩不及答但有愧服閣中愛子並想全安
望亭之行在早晚耶因風寄聲為慰幸甚幸甚麋角某

在抗越三年海上徧訪不能得乃知南中山深淺偏不
容此大物聞荆湖最多已作書澧州求矣到當奉寄京
師有所要一一示及無外無外

示及新篇君詩固佳矣然此篇又超逾前後乃用意之
至者也欽歎無量本欲作一篇看此次第更如何下手
也忽忽猶有可恨者書未佳耳呵呵示歌圖領之至樂
寂室二詩賦成即往但未讀者必先二記則詩其可復
取耶

與范文正公帖

曾仲明

拜遠風儀三換歲律而久不上記蓋無因而前惟乃心
馳仰之勤耳中春氣和伏惟鎮撫多間尊候提福數年
均佚應道氣增茂上方注意以待康濟尤願為時自愛
不宣

與韓公帖

文潞公

闕

儀日深翹想才薄任重鮮暇寄誠向審被命中宸

剖符

闕

視事屢欲脩慶幅以伸區區

之意因循多故乃草率勒此伸謝諸留面究但繼日猥
冗未由上謁累辱簡誨荷德良厚秋氣頗爽起居佳裕
詰朝之會傾俟臨況幸無見拒謹手起居其瞻向之心
旦夕以之也介至得手教承履尚清勝慰并良深所願
舟如嚴旨遣去睦嫠書亦聞命矣京醞一壺納上希檢
到勿訝輕浼匆匆奉啟不謹

昨日辱手筆未遑裁謝人來又沐教況無任感愧之至
經宿伏喜起居住裕來人欲奉邀車騎就祥符寺早膳

傾佇屈顧也寵惠聃先生傳不勝感著

信宿伏想起居均適睦歆書三通謹令納上介亭之會
卜日咨聞次傾渴傾渴

近日繼有使客雲集良苦于將迎也職此久不果往見
長瞻企之素可勝道哉雨寒起居住佳否適有客見遺糴
蟹輒敢分獻以佐案杯望賜檢納旦夕稍暇即躬造門
宇次早來改朔不果候謁人至特沐手誨竊喜起居清
勝卑體瘡瘍所苦如昨曲煩憂卹至感至感所惠藥不

往服食次忙冗草草上日以賤事羈束無緣一往少奉
長者餘論可量悵悵耳雨寒伏喜起居佳裕稍暇當卜
候謁入次臨紙不盡所懷明哲亮之而已

連日冗迫遂疎上謁前辱簡誨不獲裁謝當蒙情恕之
也雨寒體中佳否收得貂鼠褥一領輒敢馳獻以將下
誠望賜檢納容易

早來辱下手教伏承齋舸出次外聞乍遠風度豈勝依
依屬以賤事所嬰不獲躬詣江溪敘別可量悵悵耳春

寒途中千萬珍重

兩日前湖上幸獲款奉自爾以冗迫更疎占對豈勝瞻嚮之素伏承教況仍示佳付感仰不已已也如聞玉體小有違豫應詣藥喜矣未遑再造舟次姑勒此少布謝萬一秋暑惟冀寬中自愛

與王定國帖

蘇子瞻

自到黃州即屬岸人日伺舟馭消耗忽領手教頓解憂懸仍審比者體氣清健強且能自適至慰知未決東西

路計其迂直險易相去必不甚懸絕而得一見乃是不
肖大幸不識果安從某寓一僧舍隨僧蔬食甚自幸也
感恩念咎之來灰心杜口不曾看謁人所云出入蓋時
往村寺沐浴及尋溪傍谷釣魚採藥聊以自娛耳

罪大責輕得此亦甚幸未嘗戚戚但知識數十人緣我
得罪而定國為某所累尤深流落荒服親愛隔濶每念
至此覺心肺便有湯火芒刺今得奉教既不見棄絕而
能以道自遣無絲髮芥蒂然後知定國為可人而不肖

他日猶得以衰顏白髮廁賓客之末也甚幸甚幸恐從者不由此過故專遣人致區區惟願定國深自愛重仍以戒我者自戒而已臨書悵悵不知此人到江猶及見仙舟否忽忽不宣

楊州有侍其太保者官于瘴地十餘年北歸面色紅潤無一點瘴氣只是用磨脚心法耳此法定國自己行之更請加工不廢每日飲少酒調節飲食常令胃氣壯健安道軟硃砂膏其在湖州服數兩甚覺有益到彼可久

服子由昨來陳相別面色殊清潤目光炯然夜中行氣
臍腹間隆隆如雷聲其所行持亦吾輩所常論者但此
君有志節能力行耳粉白黛綠者俱是火宅中狐狸射
干之流願深以道眼看破此外又有一事須少儉嗇勿
輕用錢物一是遠地恐萬一闕乏不繼二是災難中節
用是貶亦消厄致福之一端所懷千萬不能盡一二也
遞中領手教知已到官無恙自處泰然頓解憂懸又知
攝二千石風采震于殊俗一段奇事也某羈寓粗遣但

八月中喪一老乳母子由到筠亦拋却一女子年十二
矣悼念未衰復聞堂兄中舍卒子成都異鄉罹觸物悽
感奈何近頗知養生亦自覺薄有所得見者皆言道貌
與往日殊別更相濶數年索我閬上之風矣兼畫得寒
林墨竹已入神品行草尤工只是詩殊退也不知何故
張公比得書無恙但以厚之婦家事無人幹頗牢落子
由在筠甚苦局事煩碎深羨老兄之安逸也非久冬至
已借得天慶觀道堂三間燕坐其中謝客四十九日雖

不能如張公之不語然亦當闔戶反視想當有深益處也定國所寄臨江軍書久已收得二書反覆議論及處憂患者甚詳既以解憂又以洗我昏蒙所得不少也然所謂非苟知之亦允蹈之者願公嘗誦此語也杜子美在困窮之中一食未嘗忘君詩人以來一人而已今見定國每有書皆有感恩念答之語甚得詩人之本意僕雖不肖亦當庶幾彷彿于此也文字與書皆不復作近為葵老乳母作一誌文公又求某書輒書此奉寄今

日馬鋪李孝基送君謨石刻一卷其末後有定國題字
又動我相思之懷作惡久之數日前發勾沈達過此亦
云與定國熟船中會語半夜強半是說定國近有人惠
丹砂少許光彩甚奇固不敢服然其人教以養火觀其
變化聊以怡神遣日賓去挂不甚遠朱砂若易易致或
為致數兩因寄示稍難即罷非急用也窮荒之中恐亦
有一二奇士當以冷眼陰求之大抵道士非金丹不能
解化而丹材多出南荒故葛稚川乞岵嶠今竟化于廉

州不可不留意也陳璞一月前直往筠州看子由亦粗傳妙要云非久當來此人不惟有道術其與人有情義久要不忘如此亦自可重道術多方難得其要然以某觀之惟能靜心閉目以漸習之但閉得百十息為益甚大尋常晝夜以脈候百二三十至迺是百二三十息爾數為之似覺有功幸信此語使真氣雲行體中瘴冷安能近人也知有殺賣鷺鴨甚便此間無有但買斫鱸魚及猪羊麀雁亦足矣廩入雖不繼痛自節儉每日限用

百五十自月朔日取錢四千五百足繫作三十塊掛屋梁上平明以畫權子挑取一塊即藏去權子又以大竹筒別貯用不盡者可謂至儉然猶每日一肉蓋此間物賤故也囊中所有可支一年以上至時別作相度日下未須慮也兒子正如所料不肯出官尋以公言喻之亦肯去來眷令赴銓斬黃間一官非復小補也信筆亂書無復倫次不覺累幅書到此恰二鼓書室之前霜月滿空想識我此懷也言不可盡惟萬萬保壽而已

桂砂如不難得致十餘兩尤佳如費力一兩不須致也
如聞晉卿已召還都月給百千其女泣訴聖主為惻然
也恐要知來詩愈奇欲和又不欲頻頻破戒自到此唯
以書史為樂比從仕廢學少免荒唐也近于側左得荒
地數十畝買牛一具躬耕其中今歲旱米貴甚近日方
得雨日夜壅關欲種麥雖勞苦卻亦有味鄰曲相逢欣
欣欲自號麀糟陂裏陶靖節如何君數書筆法漸逼晉
人吾筆法亦少進耶畫不能皆好醉後畫得一二十紙

中時有一紙可觀然多為人持去予君宜復有愛但卒
急畫不成也今後當有醉筆嘉者聚之以須的信寄去
也

耕荒田詩有云家重燒枯草走報暗井出一飽未可期
飄飲已可必又有云刮毛龜背上何日得成龜此句可
以發萬里一笑也故以此填空紙

今日景繁到泗州轉示十二月二十三日常惠書并新
詩六首妙曲一首大慰所懷河東膠舟咫尺千里意思

牢落可知得此佳作終日喜快滯懣冰釋幸甚幸甚某
在揚州入一文字乞常州住得耗奉邱拘微文不肯投
進已別作一狀遣人入京投下近在常州宜興買得一
小莊子歲可得百餘石似可足食非不知揚州之美窮
猿投林不暇擇木也

久不奉狀辱書感慰之至比日起居何如謗焰已息端
居委命甚喜甚喜然所云百念灰滅萬事懶作則亦過
矣大夫功名在晚節者甚多定國宣愧古人哉某未嘗

求事但事入手即不以小大為之在抗所施亦何足道
但無所愧恨而已過蒙示諭慚汗若使定國居此所為
當便驚人亦宜特止此而已本州職官董華密人也能
具道公政事歎服不已但恨公命未通耳但靜以待之
勿令中塗齟齬自然獲躋如國手棊不煩大段用意終
局便須贏也末由會見千萬保重不宣

領書所以教諭之者備矣佩感之意非書可盡謹當
遵用然所云先發謝章不待到任私意不欲爾也謝章

有過無功而禮不可闕到任一章足矣空言不足上報
萬一徒為紛紛耳諸公啟事自到後一發亦備數而已
謫居六年無一日不樂今日促令作郡坐理百姓正如
農夫小人日耕百畝負擔百斤初無難色一旦坐之堂
上與相賓饗便是一厄公之意可復勸令周旋委曲以
求售乎子由赴闕之命亦是虛傳耳

別來紛紛未即奉狀兩辱手教感愧深矣且審比來起
居佳勝為慰公失郡去國士友所嘆然自是計少安矣

其他無足言者某已得潁州極慰所欲但不副張公之意蓋旬日前得子開書極來相禱方安于彼不欲移也故不敢乞聞張公已安慶慰無量會合未可期唯千萬保嗇不宣

平生欲著一書少自表見于來世因循未成兩兒子粗有文章材性未暇督教之從來頗識長年養生妙理亦未下手三者皆大事今得汝陰無事或可法成定國必賀我也言此者亦欲公從事于此耳書至此中心欣躍

如有所得平生相知不敢獨嚮當領此意勿復念餘事也

辱書具審起居佳勝誣罔已辨有識稍慰寵二詩讀之
聳然醉翁有言窮者後工今公自將達而詩益工何也
莫是作詩數篇以餉窮鬼耶喜而不寐詩甚欲和又礙
親嫌皆可一笑也張公今雖微瘦然論古今益明不惟
識慮過人定國亦可見矣人事紛紛書不盡言非面莫
究

別來三辱書勞問之厚復過疇昔矣哀繆日退而公相
好日加所未喻也又中間一書引物連類如見當世大
賢意謂是封題之誤必非見與者而其後姓字則我也
尤所不論然三復其文詞韻甚美正是蘇州何充畫真
雖不全似而筆墨之精已可奇也謹當收藏以俟稱此
者而說與之如何如何公行復舊官矣差遣亦必自如
意可喜可喜但此去不知會合何日不能無耿耿也真
贊輒作得數句如可用即令一善寫小字人代書絹上

可也張公集引厚之字說皆未作別後日紛紛可厭可厭神膏方納上餘勤勤自愛不一

公向令作勝達道理銘已諾之其家作行狀送至此矣又欲作孫公神道碑皆不可違只告密之勿令人知是某作仍勿令以潤筆見道乃敢聞命也來書甚奇真得衝習氣力也呵呵後詩未及和朝夕別遣人并致摺淮白所欲宜興田某宜敢有愛於此等然此田見為元主昏賴某見有文字在浙漕處理會未見了當申都省也

田在深山中去市七十里但便于親情蔣君勾當耳不知異時蔣君能復如此幹否更請壽之

先帝升遐天下所共哀慕而不肖與公蒙恩尤深固宜挽詞少陳萬一然有所不敢者耳必深悉此意無狀坐廢衆欲致之死而先帝獨憐之而今而後誰復出我于溝瀆者已矣歸耕沒齒而已矣凡百粗遣士風食物官府事體遠不及南都西湖亦虛名亦不足道惟一味閑極可樂也公帑皆用過延客一飯而已歌者未嘗見亦

不足見也呵呵會合未可期千萬以時自愛

辱書驚聞樂全先生薨皆悲慟不已元老凋喪舉世所
痛豈獨門下義舊雖壽祿如此而吾儕不復見此師範
奈何奈何方欲乞移南都往見之今復何及尚賴定國
在彼差慰其臨沒之意聞屬纊之際猶及某與舍弟痛
哉仰惟寬懷且厚助之迷中幹後事也執筆愴塞不次
專人來辱書且審起居佳勝張公行狀讀之感慨內有
數次須至商量藏帖持去乞細與批鑒附來高文固佳

妙無可指摘但其間不免有愚意未安者必是老謬不足曉煩公開諭仍不深訝蓋張公文志又不可不盡心同慮也惶悚惶悚仍雖索便下筆也末由瞻嚮千萬加愛不一

不見定國一年不與定國書半年每得來書慚愧滿面欲答又懶而止每想君熟知我此態不復以為怪也即日起居何如知受任安肅廟堂既未能置君于所宜獨無一稍佳處乎料亦都不計較許時見過之語似少的

今歲必不失望矣河水既不至此間諸事稍可樂幸早
臨僕秋中當再乞南中一郡耳屢蒙寄詩老筆日可畏
殆難陪奉字法亦然異日當配古人矣酷日萬萬自重
有一事拜託抗人欲開封田蓋五六十一年矣但有志於
民者無意經營亦不數公下手開鑿終于不成惟不肖
偶得其要開之月餘有必成之勢吏民歡快如目去翳
近奏乞度牒五十道終成之一奏狀一申三省皆詳盡
利害公為一見莘老痛致此意

二狀一觀之近奏事多蒙開允必莘老之力更乞應副
此一事使西湖一旦盡復有唐之舊際山為界公他出
守此邦亦享安樂切望痛與留意近說與子由令為老
兄力言而此人懶慢謬悠恐不盡力故以此託定國彼
此非為身事力言何嫌也

某一味絕學無憂歸根守一乃至無一可守此外皆是
幻此道勿謂渺謾信能如此日有所得更做沒用處亦
須作地行仙但屈滯從狗竇中過耳勿說與人但欲老

弟知其畧耳間所欲幹實無可上煩者必欲寄信只多
寄好乾棗人參為望如無的便亦不須差人宜可以口
腹萬里勞人哉所云作書自辨者亦未敢便致耳不怨
天不尤人下學而上達知我者其天乎張十七絕不聞
消耗進矣仍存性否懷仰樂全之舊德故欲其一箴之
否

五百家播芳大全文粹卷六十四